

Seker is seker: Martini maal anners

In de Lockdown Light siten wi hier nu all mitnanner in Novembermaant. Dit Jahr is 't all anners as in anner Jahren. Nützt ja nix, daar mutten wi nu dör. Van 't Jötern, Jöseln un Klagen word dat seker neet beter. Siet Määrtmaant word van uns verwacht, dat wi kreativ worden un ok alltied improviseren können. De AHA-Regel kennen wi intüsken al in d' Slaap.



Antje Lübben

Mi is upfallen, dat de up Platt wall ehrder en OHO-Regel is: Ofstand, Hygiene, Olltagsmaske. De Mund-Nö-

sen-Bedecken (MNB) heet bi de een of anner van uns „Snutenpulli“ of as bi de Nederlanners „Mundkappje“. Ok dat Woord „Mund-Nösen-Bikini“ (för MNB) hebb ik in Oostfreesland al höört. Up Ofstand gahn, dat is beter in disse Tieden van de Covid-19-Pandemie.

Gallmarkt is dit Jahr ofseggt worden. De Oostfreeslandschau kunn neet stattfinnen. Mit Martini un de Martinsdag was dat dit Jahr ok anners. Vööl Veranstaltens to Martini un to de Martinsdag sünd to Sekerheid futt ofseggt worden. Mit Singen is dat ja 2020 ok so en Saak. De Kinner sullen egentlik ok heel neet to Martini lopen. Man verbeden wull een dat Bruukdoom denn ok neet kumpleet. Hier up Nördernee sünd de Kooplüü kreativ wor-

den un hebben na Lösens söcht.

Normalerwies lopen hier de Kinner up 't Eiland in Verkleiden to Martini dör de Stadt. Se trecken verkleddt as Eenhoorn, Pippi Langstrümp, Super Mario, Batman of in en anner Phantasie-Packje van Laden to Laden un kriegen Slickerkraam, Zuckerlaa of sükse Saken schunken. Daar freien sük de Kinner ok al dat hele Jahr up. Martini is hier heel wat Groots!

Dit Jahr komen de Kooplüü bi de Kinner. Ja, in dit Jahr packen de Kooplüü van d' Stadt vördeem de Geschenkpüten för de Kinner van d' Kinnergaarns un van d' Scholen. Dat Motto heet dit Jahr: Seker is seker. Wenn ji neet na uns henkomen köönt, denn komen wi bi jo.

KOLUMNE

Moin, Moin
Schrievers Sprak
allerbest moje
Pläseer **Vertellsel**
Smüstern hoop

Platt maakt

All mooi mit Ofstand. Över de Scholen un Kinnergaarns löppt dat hele Wark denn. So word dat maakt. Kieneen kann sük so wat weghalen. Dat Virus word up disse Aard un Wies neet wiederdragen, umdat ja överhoopt kien direkte Kuntakt stattfinnen deit.

Een mutt blot en paar kreative Ideen hebben: Martini maal anners.